



Broj: 01/3-50-1-3-3/07
Sarajevo, 28. marta 2007. godine

Z A P I S N I K
3. sjednice Komisije za vanjsku trgovinu i carine,
održane 28.3.2007., s početkom u 15,45 sati

Sjednici su prisustvovali: Snježana Rajilić, Mehmed Suljkanović, Ekrem Ajanović, Šemsudin Mehmedović, Edin Mušić, Jozo Križanović, Jerko Ivanković Lijanović i Slavko Jovičić. Odsustvo je opravdao Hadži Jovan Mitrović.

Sjednici Komisije prisustvovali su i:

- Dragan Mektić, pomoćnik ministra vanjske trgovine i ekonomskih odnosa BiH, i Nada Šupić, šef Odsjeka za pravne poslove,
- Davor Palinić, zamjenik direktora Agencije za nadzor nad tržištem u BiH.

Jednom dijelu sjednice prisustvovao je Milorad Živković, u svojstvu predlagača zakona.

Predsjedavajuća Komisije Snježana Rajilić predložila je da se dnevni red predložen u pozivu za sjednicu dopuni još dvjema tačkama – Zauzimanje stava u vezi s materijalima koji se Komisiji dostavljaju povodom održavanja Okruglog stola " Analiza zakonske regulative u funkciji zaštite domaće proizvodnje", kao i tačkom Razno.

Nije bilo primjedbi, pa je predsjedavajuća konstatirala da 3. sjednica Komisije ima sljedeći

D N E V N I R E D

1. Razmatranje Prijedloga zakona o dopuni Zakona o nadzoru nad tržištem (predlagač: Vijeće ministara BiH),
2. Razmatranje Prijedloga zakona o izmjenama i dopunama Zakona o carinskoj tarifi BiH (predlagač: poslanik Milorad Živković), radi podnošenja mišljenja, u skladu s članom 104. novog Poslovnika Predstavničkog doma,
3. Zauzimanje stava u vezi s materijalima koji se Komisiji dostavljaju povodom održavanja Okruglog stola " Analiza zakonske regulative u funkciji zaštite domaće proizvodnje", i
4. Razno.

Ad – 1. Razmatranje Prijedloga zakona o dopuni Zakona o nadzoru nad tržištem
(predlagač: Vijeće ministara BiH) – razmatra se po starom Poslovniku Doma

Nada Šupić iz Ministarstva vanjske trgovine i ekonomskih odnosa BiH obrazložila je Prijedlog zakona. Naglasila je da Zakonom nije određeno sjedište Agencije, pa je Odlukom određeno privremeno sjedište u istočnom Sarajevu, što se predlaže Prijedlogom zakona o dopuni Zakona o nadzoru nad tržištem.

Naglasila je da je jako bitno donošenje ovog zakona i da je Prijedlog zakona usvojen u Vijeću ministara BiH.

Predstavnik Agencije za nadzor nad tržištem rekao je da se radi o dopuni Zakona koju je jako bitno usvojiti, jer je Zakonom rečeno da se sjedište Agencije ne može određivati odlukom. Bez zakonskog određivanja sjedišta Agencije nije moguće izvršiti registraciju i druge obaveze koje uz to idu.

Jozo Križanović pitao je da li Agencija radi, s obzirom da je Odlukom određeno privremeno sjedište, na što je od predstavnika Agencije dobio potvrđan odgovor.

Križanović je dalje rekao da je on mislio da Agencija i ne radi. Dodao je da je prošlo više od dvije godine od usvajanja zakona a da ovo pitanje nije riješeno. Iznio je generalnu primjedbu da je Zakon o nadzoru nad tržištem donesen 2004. godine, a da je tek krajem prošle godine osnovana Agencija, što je nedopustivo.

Slavko Jovičić također je rekao da ima generalnu primjedbu da se zakoni usvojeni u Parlamentu veoma sporo provode u praksi.

Predsjedavajuća Komisije Snježana Rajilić podsjetila je, poslije rasprave, da na Prijedlog zakona nije uložena nijedan amandman, pa je Prijedlog zakona dala na glasanje.

Komisija je jednoglasno:

- podržala principe predloženog zakona;
- konstatirala da na Prijedlog zakona nije uložena nijedan amandman;
- prihvatila tekst Prijedloga zakona u tekstu kako je predložilo Vijeće ministara BiH i
- konstatirala da je Prijedlog zakona neophodno donijeti.

Za izvjestioca na Domu Komisija je odredila predsjedavajuću Snježanu Rajilić.

Ad – 2. Razmatranje Prijedloga zakona o izmjenama i dopunama Zakona o carinskoj tarifi BiH (predlagač: poslanik Milorad Živković), radi podnošenja mišljenja, u skladu s članom 104. novog Poslovnika Predstavničkog doma

U svojstvu predlagača zakona, **Milorad Živković** podsjetio je prisutne da je Prijedlog zakona u prošlom sazivu Doma predložio Nikola Špirić i da je on u ovom mandatu preuzeo svojstvo predlagača s obzirom da Špirić više nije poslanik. Svrha predloženih izmjena i dopuna Zakona o carinskoj tarifi je da se zaštiti domaća proizvodnja, rekao je Živković.

Mehmed Suljkanović podsjetio je da je o ovom pitanju ranije razgovarano i da je načelan zaključak da se pristupi izradi jednog sveobuhvatnog prijedloga izmjena i dopuna Zakona o carinskoj tarifi kojim bi se obuhvatile i izmjene iz ovog prijedloga. Založio se da se razmatranje ovog zakonskog prijedloga odgodi dok se sve ostalo ne pripremi.

Ekrem Ajanović saglasio se s mišljenjem Suljkanovića, naglasivši da se što prije nađe modus da se ide s novim prijedlogom, kako ovaj ne bi dugo čekao. Predložio je da se pripremi novi zakonski prijedlog i da se usvoji na narednoj sjednici Komisije.

Šemsudin Mehmedović rekao je da su se ranije dogovorili i da bi Komisija trebalo da izađe sa zakonom gdje će sve proizvode koji se uvoze oporezovati nultom stopom. Ima sporazum o slobodnoj trgovini bez carina sa Srbijom i Hrvatskom. Do sljedeće sjednice treba pripremiti sveobuhvatan zakon, ovo je samo jedna kap u moru, rekao je Mehmedović.

Snježana Rajilić pitala je da li se može tako brzo izraditi zakonski prijedlog. Ako ne može, mora se ići s ovim, ne može se čekati.

Šemsudin Mehmedović odgovorio je da on već ima pripremljen dio zakona i da misli da se do sljedeće sjednice to može uraditi.

Milorad Živković rekao je da on pristaje da se odgodi razmatranje njegovog zakonskog prijedloga do 12. aprila, a ako do tada ne dostave nove prijedloge, neće se s ovim moći više čekati.

Jozo Križanović naglasio je da se ova komisija na samom početku mandata odredila da će ići na uklanjanje barijera, te da misli da bi bilo dobro da se Komisija negativno odredi o ovom zakonu, pa da onda ide s novim zakonom.

Snježana Rajilić nije se saglasila s ovim prijedlogom.

Šemsudin Mehmedović podržao je mišljenje Križanovića, uz garanciju da će u novom prijedlogu ići ovo što se predlaže u predmetnom zakonskom prijedlogu.

Slavko Jovičić rekao je da prihvata prijedlog da se odgodi ovaj zakonski prijedlog do naredne sjednice Komisije i predložio da se ide u aktivnost zajedno s resornim ministarstvom i da se uzme u obzir ono što je bilo na Okruglom stolu.

Živković je rekao da može pomoći utoliko što ne insistira da se Komisija danas izjašnjava o njegovom prijedlogu zakona, ali samo do 12. aprila.

Pomoćnik resornog ministra **Dragan Mektić** rekao je da bi Prijedlog zakona koji je već ušao u proceduru trebalo da ide dalje. Ranije smo ovo zaustavili da bi mogli ići na pregovore s Evropskom unijom. Kao član pregovaračkog tima, mislim da su prihvatljive izmjene i dopune predložene ovim zakonom. Ovo što je bilo na Okruglom stolu mislim da neće moći ići, rekao je predstavnik resornog ministarstva.

Mehmedović je pitao da li je ovo 5% prihvatljivo.

Jerko Ivanković Lijanović pitao je, ako bi šećer i kakao uvozili iz Hrvatske i Srbije, da li uopće ne bi imali carine? Mi onda omogućavamo Srbiji i Hrvatskoj da povećavaju cijenu, kazao je Ivanković Lijanović.

Dragan Mektić iznio je određene procente po tarifnim brojevima.

Ekrem Ajanović rekao je da se danas može odgoditi razmatranje ovog zakona i da se do naredne sjednice pripremi novi sveobuhvatniji prijedlog izmjena i dopuna Zakona o carinskoj tarifi.

Šemsudin Mehmedović rekao je da on već ima pripremljen tekst.

Snježana Rajilić podsjetila je da se i na prošloj sjednici govorilo o ovom pitanju, da se i u Republici Srpskoj vodila rasprava o akcizama, ali da je to sve negdje zastalo. Nije se išlo ni prema Vijeću ministara BiH ni prema Upravi za indirektno oporezivanje BiH. Uz sve primjedbe, mislim da praktično nije moguće to sve skupiti do 12. aprila. Moramo za sve imati mišljenje Uprave za indirektno oporezivanje BiH i Vijeća ministara BiH. Sve što se radi prebrzo ne bude baš dobro, kazala je predsjedavajuća Komisije. Zatim je predložila da se za petak sazove sjednica Komisije, na koju će biti pozvani predstavnici Vijeća ministara BiH, Uprave za indirektno oporezivanje BiH, Ministarstva finansija i trezora BiH, Minsitarstva vanjske trgovine i ekonomskih odnosa BiH i Vanjskotrgovinske komore BiH. Također je predložila da se sat prije početka sjednice Komisije sastane rukovodstvo Komisije, kako bi pogledali pripremljeni materijal.

Prihvaćeni su prijedlozi predsjedavajuće Komisije, **pa je zaključeno da se sjednica održi u petak, 6. aprila 2007., u 11, sati, a u 10 sati da se sastane rukovodstvo Komisije. Osim članova Komisije, na sjednicu treba pozvati predstavnike: Vijeća ministara BiH, Ministarstva finansija i trezora BiH, Ministarstva vanjske trgovine i ekonomskih odnosa BiH, Uprave za indirektno oporezivanje BiH i Vanjskotrgovinske komore BiH.**

Ad – 3. Zauzimanje stava u vezi s materijalima koji se Komisiji dostavljaju povodom održavanja Okruglog stola "Analiza zakonske regulative u funkciji zaštite domaće proizvodnje"

Predsjedavajuća **Rajilić** kazala je da je, nakon održavanja Okruglog stola, stiglo više materijala od raznih udruženja i da će svi biti dostavljeni članovima Komisije. Predložila je da se materijali pročitaju pa da se naknadno o njima zauzme adekvatan stav. Napomenula je i da je dostavljen transkript rasprave na Okruglom stolu, predlažući da se iz transkripta sačini sažetak rasprave i da se dostavi članovima Komisije.

Nije bilo više rasprave o ovoj tački.

Ad – 4. Razno

Ekrem Ajanović iznio je mišljenje da bi trebalo primiti predstavnike poljoprivrednika Bosne i Hercegovine kako bi se razgovaralo o problemima i vidjelo šta se na tom polju može učiniti.

Šemsudin Mehmedović podržao je mišljenje Ajanovića.

Snježana Rajilić je, međutim, kazala da se javlja više udruženja i da se ne bi moglo samo s ovim održati sastanak. Kazala je da su se njoj javljali predstavnici Pivare iz Jajca i da ljudi iznose konkretne životne probleme. Ima zaista mnogo problema i treba vidjeti kako se svima na neki način može pomoći.

Ovim je, u 17,20 sati, završena 3. sjednica Komisije.

ZAPISNIK SAČINILA
Rajka Stanišić

PREDSJEDAVAJUĆA KOMISIJE
Snježana Rajilić